

Carlo Isaia

Raccolta di poesie

PREFAZIONE

Tale raccolta è di chi è, o presume di essere, un accettabile poeta di San Martino, ridente rione napoletano.

La Poesia Napoletana è densa di umanità, di amore, e di realtà vissuta e, se ci si inoltra per i vicoli di questa Città, vi sono ancora molti 'poeti' e 'cantanti' che si esprimono in una moltitudine di stili.

Pertanto ci affidiamo alla bontà dell'eventuale lettore di 'sopportare' questi versi del nostro modestissimo autore che da sempre ama follemente la sua Napoli

*Prefazione mediatica di Antonio de Curtis,
Principe di Bisanzio, in arte Totò*
a cura di Ciccio D'Auria

Carlo Isaia, autore di questa raccolta di poesie, si è rivolto a me dicendomi, che da nobile quale fui e sono, non mi potevo sottrarre al compito di sollecitare l'attenzione, almeno dei vomeresi per la Musa di un vomerese doc.

M'ha confessato di aver scartato l'idea di rivolgersi, per la bisogna, al mio amico Eduardo sapendolo un tantino venale. Non si sarebbe accontentato dell'unico omaggio (non diciamo compenso) che lui Carlo poteva fare: una messa (non cantata) di suffragio; ne avrebbe pretese almeno dieci, mentre io, diceva Carlo, essendo un Principe mi sarei accontentato. Tramite una "medium" accreditata qui da Noi, m'ha fatto pervenire questa raccolta di poesie. Era dal 15 Aprile del '67 che non leggevo, e l'ho fatto volentieri: non male, devo dire, certo che non si possono accostare alla mia "Livella" ma, ripeto, non male!

Carlo è un filosofo partenopeo che ama la nostra città, il suo quartiere, i suoi vicini che poi amorevolmente sfotte di tanto in tanto. Ai versi affida il rammarico per il degrado prorompente degli uomini e delle cose. Ma spera sempre!!

Vi consiglio di leggerli a prescindere dalla messa di suffragio che m'ha promesso.
Totò


“Napule... Na”

Napule è Storia, Napule è poesia
certo è 'o paese chiù bello che ci sia,
È na città che cu stù bello mare
è fatta 'e gente che vuol farsi amare.

Napule è armonia, felicità,
sfuttò, surrisi e comicità.
è na città che sola, miez'a tante
tene nu popolo ch'è fatto e cantanti.

E po' miez'a chest'aria d'allegria
tene o “DNA” d'a poesia,
già, pecchè Napule è nu pezzo e Storia
e stà pe sempe fisso dint'a memoria!

E allora nun v'adda parè strano',
s'ho fiero d'essere nu Napulitano
e, sarrà presunzione, 'o ipocrisia
ma aggu tentato e fa.....na poesia!!



“Io so accusì”

Chissà, forse so stato sfurtunato,
ma io sò accusì a che sò nato,
e, addirittura, e nun me piglio scuorno,
io tengo a capa fresca “notte & juorno”.

E' overo che stu munno è chieno e guai,
però a stì cose io nun ce penzo mai
e po', tengo na specie e malatia,
voglio campà dint'a filosofia!!

Ma po' io nun me sò mai lamentato
e vivo overamente alla giornata,
me sceto, ...ma nun saccio ch'aggia fa
cerco sultanto e nun me 'ntussecà!

Parecchi dicono ch'io sò fatto strano,
senza capì che sò “Napulitano”
e chello ch'adda fà non se lo sceglie
pecchè, ...cuofano scenne, e cuofano saglie!!

Ognuno e nuje tene a capa che tene,
a mia m'ha tengo, e overo me cunvene,
e già pecchè a faccia e tanta gente
io affronto chesta vita... ...Allegramente!!!

E, a chi “mi legge” io le vulesse dì,
è nu cunsiglio, stateme a sentì:
si overamente buono vuò campà
e cose brutte cerca e nun'e penzà!

*VURRIA campà Cient'Anni
libero, senz'affanni!!*

A matina

Na persiana s'arape chianu, chiano
e 'ncoppa a spalla te tuzzulea na mano,
o cafè pronto 'ncoppo o comodino
e a musica e na radio sta vicino.

Che brutta cosa è a te scetà a matina
pure si è bella l'aria e San Martino,
e tieni sempe chi t'adda scetà,
nun tieni mai na vota a vuluntà.

Invece è bello quanno cierti vote
te giri, e t'addurmienti n'ata vota
e te fai na mezz'ora accussì bella
che in italiano se chiamma "a pennichella"

Io vulesse chiù oggi che dimane
caccià na legge p'e Napulitane.
na legge fatta proprio seriamente
ch'accuntentasse a tanta e tanta gente.

La legge dice che a Napoli ogni giorno
bisogna alzarsi soltanto a "mezzogiorno"
e chiunque se sceta chiù ampreso
e corsa va a fernì sotto processo.

“O Primm’appuntamento”

‘O primm’ammore o saje
nun se po’ scurdà maje,
bell’è chillu mumento
d’o primm’appuntamento.

Che scuorno, e nun me sbaglio,...
io addivintaje cacaglio,
m’avvicinaie, ...e a vî loco,
essa:... ..na lampa e fuoco!

E e vote, e 6 a matina...
ma overo ero cretino,
durmenno, quatto, quatte,
pigliavo “o 24”...,

o Tram, ch’io guaglione
jeve n’copp’o staffone:
però, ...quann’era bella
stà Piazza Vanvitelli!!

E a scola? ...nu filone,
ma, ...che cunsulazione.
Sempe me vene a mente...
“o primm’Appuntamento”!!!

Nustalgia d’o passato...!!!!
1948

“Na fronna”

Pecchè quando te cerco t’annascunne.
forse nun sai, sì sulamente fronna,
e si te muove se sente nu fruscio,
e a me pare che fosse sulo o mio

Ma io te voglio pecchè sento l’ebbrezza
che tu tieni inzieme a stà frischezza,
e forse ha tieni sulamente tu,
e sì l’essenza e na bella giuventù

Tengo paura sempe che te perdo,
tu fronna che sì sempe tutta verde.
e io te vurria tenè attaccata ‘o ramo
pe te dicere apertamente... “t’amo”

Pur’io so fronna,... ..ma so già appassita.
me so ingiallita, quasi senza vita,
po’ so già secca, so chella e l’Autunno
fra poco cado,...vaco all’atu munno!!

E allora p’addulcì sta vita mia
t’aggia tenè sulo ‘int’a fantasia,
pure si mò stà lacrema me ‘nfronna...
tu giuventù sì sulamente fronna!

Autunno Vomerese

1987



“Napule,...comm'era,...e comm'è mò!”

Comm' era bella Napule, tanti e tant'anni fa,
sò belli stì ricordi, che gran felicità
a strada d'a “Nfrascata”,
mò 'o nomme s'è cagnato,


e, pe ghi 'ncopp'o Vommero, 'o calvario,
steveno sulo e scale d'o Petraio.
E, sfurzanno 'o ricordo chianu, chiano
ce vene a mente “o largo d'Antignano”

E cierti vote, scetannete a matina
sunnavi a casa 'ncoppo San Martino.
Se meretavano e stà dint'a vetrina
stì splendori e Marechiaro e Mergellina,

e, all'improvviso po' me vene annanze
Pusilleco, e o Parco a Rimembranza,
e, e vote capitava l'occasione
e visità e Grotte o Chiatamone.

E po' tanta armonia, felicità, allegria
gente chiena d'ammore e grande simpatia...
pe nuje quasi pareva che fosse 'o Paravise
insieme a chistu popolo sempe cu nu sorriso!!

Ma mò chello ch'è stato, è stato
scurdammece sti cose d'o passato
già, pecchè po', la cruda realtà
Napule d'oggi, è proprio chesta cà



“O ricordo d’a 1000 LIRE ”



Sarò sincero, e pirciò v’ho dico
ma io sò fatto ancora a modo antico,
già, sò nostalgico, e forse nun me crire
io tengo a nustalgia d’a “vecchia Lira”

Pecchè a quanno st’Euro è arrivato
io tengo tutte ‘e cervelle ‘mbriacate,
pecchè oggi ‘o campà è sconfortante
a metà mese...e sacche sò vacante:::..!

Nun me saccio spiegà ch’è capitato
certo però ch’a vita è aumentata,
pecchè cu o cambio d’a muneta antica
a tirà annanze mò se fa fatica.

E, addirittura a chi cerca a carità,...
t’hai stà accorto a chello che vuò dà,
pecchè si è poco, putisse avè a sorpresa
ch’o puveriello se po’ senti offeso!

E si all’incrocio ‘o semaforo è russo
è certo che tu sbatti n’faccia ‘o musso
e qualche specie d’extracomunitario
che, con un fare alquanto autoritario,


o e fazzulette tu te l’hai accattà
oppure o vetro annanze adda lavà!!,
però alla fine, ed è lapalissiano,
tu c’hai lassà....tutto l’Euro sano.!

Invece cosa strana, anticamente
cu duje o treciento lire era cuntento,
pirciò, meglio a campà senza o progresso....
sinnò, jammo a fernì tutti...’int’o ce..o!!!

...E tirammo a campà!!

“M’Paravise”


Vommerò, a Floridiana, San Martino
cu st’aria bella e fresca e sta collina
addò ‘int’e facce tu truove nu sorriso,
si chiude l’uocchie, te pare ‘O Paravise!



E a me mò nu ricordo me cunsola
e quanno t’aspettavo fora a scola,
e doppo tutt’e duje, cu gran calore
avjmmo scuperto na parola “Ammore”

Mò, p’arrivà in zona collinare
ce stà na scatula,....a Funiculare
ch’anticamente, o tempo e Masaniello
ce putive sagli...cu o ciucciariello

O tempo passa, e chiù e cient’anni fà
ce fue “Funiculì-Funiculà”
ma, dint’e ricordi e chella giuventù
miez’a na folla ...ce staje sempe “tu”!!!



'E viche e Napule

Na stanza fredda, na ragnatela appesa,
fora a fenesta doje lenzulelle stese,
doje seggie vecchie, rotte, spagliate
na cristalliera tutta arrepezzata!!

Na tavula azzuppata n'faccia o muro
e nu stanzino stritto,quasi o scuro,
n'terra na criatura assaje bellella
ch'a quatte mani pazzea "a pecurella".

L'ato, 'n'copp'a nu lietto accucciulato
cu na faccella janca e nu malato
tremmanno dice ,ma... ma... ma... mamma
ma nun t'accuorge che tenimmo famma?

L'uocchie scavate, tutta pelle e ossa,
cercanno e s'affucà nu colpo e tosse
s'avvia ma camenanno chianu, chiano
cu na ciotola n'mano... e o tuozzo e pane.

Nu poco e viento,... stà porta s'arape,
stì cose ccà, o munno nun'e sape,
pò n'ombra annura, secca, a faccia seria
trase e se ferma cà, ... è a "MISERIA"!!!

“A Puntura...”

Comme sò squilibrate
stì giuvane drogate
e vide che camminano ballanno
e...nun sanno maje chello che fanno!!

A me fanno sultanto cumpassione
e chissà si nce stà na soluzione
pecchésulo a vederli é nu scunforte
e e vote pe qualcuno ...nce stà a morte!!!!

E, quanti e quanti dint'o vico oscuro
e vide che se fanno sta puntura
e pe qualche minuto chisti pazze
forse nce truvarranno nu sullazze.

Io penzo nu rimedio c'adda stà
e l'Uommene e Governo l'hanna fa,
nce vò sultanto na forte autorità
e troppo tiempo nun'adda passà!!

Pirciò, pigliate a sti “Quatte Scurnacchiate”...
che stanno a ‘ncoppa”, e già se sò abbuffate ...
e, siccornme chi sò, ...cert se sape
senza paura, tagliatence ‘e cape!

E, forse chesta giuventù sbandata
finalmente se pò vedé cagnata,
e pò capì ch'a vita é bella, ... e dura (!)...!
senza fa uso e sta zozza e puntura!

Spem ultima mors...
1978

“Era ‘o salotto ‘e “Napule”

Purtroppo mò, sangue della miseria,
stù fatto a Napule overamente è serio
pecché chistu “salotto”, e nun me sbaglio
è addivintato ... nu campo e battaglia!

E già pecchè sta “Piazza Vanvitelli”
era davvero ‘o posto chiù bello
addò na vota gruossi e bambini
respiravano l’aria e sta collina.

Ma mò stì cose è meglio che me scordo
pecché songhe sultanto nu ricordo
e pe ce cunsulà parola mia
s’addà campà sulo cu a fantasia.

Forse cu na gran forza e volontà
nu poco e pace putessimo trovà
che ce facesse turnà all’improvviso
a tutti e Vomeresi nu sorriso,

però purtroppo, e chesta è a verità
è sulo suonno, ... nun’è realtà
ma na speranza, e nun’è sulo a mia,
e che turnasse ..bah,vulesse IDDIO!

Spem ultima mors
Un Vomereze fiducioso!
Napoli 2005

“L’Arcobaleno”

Vì che m’è capitato stammatina
mentre m’affaccio a n’coppo San Martino,
dint’a stu cielo, chieno e malincunia
nu raggio e luce te regne d’allegria!

Na cumitiva e nuvole, nu poco triste
all’improvviso sta luce l’hanno vista,
e chist’immenso cerchio l’ha abbracciate
e accussì tutte se sò rallegrate.

E nun nce steve chiù mò o cielo oscuro,
pecchè stu raggio e mille culure
o munno sano pò ha illuminato
e tanti forse se songhe ‘nnamurate!!

S’aveva immortalà sta bella scena,
chistu spettacolo ch’è l’Arcobaleno,
pecchè stu Cerchio e felicità
forse chiù spisso s’avesse presentà.

E stì culure te creano armonia,
... ma nun’è realtà, è fantasia
che ogni juorno, pure chianu, chiano
putesse rallegrà o munno sano.

E già pecchè comm’oggi, all’improvviso
putesse rjalà a tanti nu sorriso,
e forse pò putesse essere capace
e purtà a tutta a gente “n’aria e pace”.

Però purtroppo, chist’Arcobaleno ...
nun è sicuro ... si dimane vene,
e, nun se sape si putarria purtà
n’aria felice a chesta UMANITA’!!!

Comme vurria che fosse!
Vomero 29/11/2005 h. 8,10

“Stà affacciata a ‘o balcone”

Signò buongiorno,né oggi comme state
vi vedo calma,nun state amareggiata,
ma è strano,...nun me vurria sbaglià...
dint’a nuttata,...chi era a strillà?

Nun me ho vulite dì,ma io l’ho capito
è certo,è stato vostro marito,
e stò vedendo... ..ma che v’è capitato,
ué, vuje tenite n’uocchie ammarrato!

Sentite a me,caro dirimpettaio
a vita mia overo è nu calvario,
v’ho voglio dì, e nun me piglio scuorno,
io campo ‘zuffunnata miez’e corna.

E penso nun sò tanto malamente...
io ‘ncoppo o lietto songhe nu purtento,
addirittura cu o tempo e senza j e press
me fermarrie sulo a matina appriesse!

Però purtroppo po’ chill’ “omme e niente”
chello che le facc’io nun’è cuntento,
e, quann’arriva a casa e sta ‘ncazzato...
comme s’è visto me regne e mazzate.

Cara signora io sò dispiaciuto
di tutti questi guai ch’avete avuto
e stò pensando... ..a che putesse fa,
se in qualche modo...ve putesse cunsulà

Me so distratto, e resto deluso,
me giro,e veco ch’o balcone è chiuso...
ma io insisto e tengo a capa tosta:
e so sicuro... ..che me l’ha fatto apposta

Fu... ..na figura... e m a!
1997

A miseria fa a Guerra!

A vita, e vote po' addivintà amara
si all'improvviso mancano e denare.
L'ammore, comme dice cierta gente
po' fa felice pure a chi è pezzente.!

Ma chesti frasi sò sulo fesserie,
e nun se po' magnà cu a fantasia:
succede spisso, e nun'è cosa rara...
che nun se po' campà senza e denare!

E, siccomme o sazio nun crede o djuno
è certo che nun truove mai niscjuno,
pure si aspgetti paricchi dimane...
che te promette,...e te vò dà na mano.

E allora, nun truove attuorno l'armonia,
te senti sulo, te manca a cumpagnia,
pare che forse.... sprofunnasse a terra
te giri, e vide sulo....." n'aria e guerra!

Accussì è a vita!

A verità e a buscja

Esiste una parola, VERITA'
parente stretta d'a sincerità,
e tantu, tant'amica e l'umiltà,
che fosse a "cummarella" d'a bontà!

Si po' se parla pure e l'amicizia
parlammene, ma sulo pe nu sfizio
chè, stà parola è grossa miez'a l'ate
ma nun'esiste manco cu nu frato!!

Pecchè chesti parole accusi belle
sò nate sulo pe creà burdello
e forse penzo che,parola mia
o Munno d'oggi è tutto na "BUSCJA"!

A vita è fatta sulo d'illusioni,
offese, sufferenze, e umiliazioni,
pirciò quanno cammini....guardate areto
che ce stà sempe chi te tira e prete!!!

Cheste sò verità!

“L’Umanità”

Nelle tragedie si dice...dov’è DIO,
ma in fondo poi,... quello che penso io
sicuramente la cruda realtà,...
dobbiamo chiederci:...dov’è l’Umanità?

Perché lo credo, e, senza ipocrisia...
d’altronde, simme tutti “figli e DIO”
e allora, pecchè tanta crudeltà
nun simme figli,?... non c’è fraternità?

Insomma allora, e forse ‘o Munno o sape
che simme overo l’uno peggio e l’ate,
e va a ferni’, che forse chianu, chiano
succede che nun simme chiù Cristiani

E allora mò, scetammece d’o suonno
pecchè o sinnò po’ jammo tutti ‘n’funno
e, cu gran volontà, e ciò cunviene
cercammo e ce vulè...nu sacco ‘e Bene!

E, forse., si stà cosa succedesse,
e ‘o Munno all’improvviso se cagnasse
sicuramente, (chisto è ‘o penziero mio),...
fossemo overo tutti ... figli e DIO!!!.

Chissà...!

“Nfamita”

A vita putarria essere bella
sì nun ce fosse in giro stu burdello,
che nun ce stesse tutta sta miseria,
e, nun regnasse tanta cattiveria.

E stà crescenno, e, senza pietà
in abbondanza troppa ‘nfamità,
e ogni juorno tantu sanghe scorre
pecchè esiste sta zozza e camorra!

E nuje po’ simme tanti birilli,
addò ‘o gruosso se magna o piccirillo,
e spisso qualcheduno trova a morte
pecchè o debole è vittima d’o forte.

Cu troppa gente che soffre tanti pene,
pare che nun’esiste manco ‘o bene,
comme si scumparesse l’umiltà
e trasfurmasse tutta l’umanità.

Pe grazia e San Gennaro, o Sant’Antuono
o “malamente”....addivintasse “buono”,
e, finalmente tutta l’Umanità
se trasfurmasse in umile bontà!!!

Comme vurria che fosse
chissà, si se putesse!

“A gioia e nu tramonto”

A sera quanno sponta
chest'ora d'o tramonto
io me metto a penzà
là, n'cielo che ce stà!

Na cumitiva e nuvule cammina,
e n'ata corre pe le stà vicino:
songhe felici si stanno tutti insieme
e forse è o segno che se vonno bene.

E po', purtanno 'o sguardo chiù luntano
na luce rossa scumpare chianu, chiano'
e se sente na musica assai bella:
...ma, è sulamente 'o canto e l'aucielle!

Po' se scurisce o cielo, e, all'improvviso
scumpare a 'ncopp'a faccia nu sorriso,
e me so accorto... ...e chesta è a verità...
che so turnato n'terra... ...ch'aggia fa?

Contemplazione
Napoli 16 Agosto 1994

“All’Aldilà”

Chissà si è overo che... ..quanno sarrà!!!
n’cielo, ’int’e nuvole, v’avisseve ’ncunrà,
e certamente fosse overo bello
continuà ancora a fà burdello.

E allora forse ...venesse na crisi,
s’arrevutasse tutto “o Paravise”,
pecchè là ’ncoppa, e ce ne stanno tanti
s’appiccecassero overo.....pure e Santi!

Pirciò per evitar ognuno e vuje
quanno sarrà... ..jesse pe e fatti suoje
pecchè, nuvola ccà, nuvola là
tutta a jurnata stissevo a zumpà.

Insomma, p’evità chistu sfacelo
che scumparesse a Pace pure ’n’cielo
na sola cosa, se putesse fa
cercate n’terra e ve rappacificà!

Sulo accusì, saglienzo m’Paraviso
trasisseve abbracciate, e cu o sorriso!!!!!!

Chissà...!!



“A Vita...comm'era”

Comm'era a vita qualche secolo fa,...
già esistevano tanti brutalità?
C'erano overo tante cattiverie,
e, già regnava sta sporca e miseria?

Ed io po', sfuglianno e libri 'e Storia,...
ma stu ricordo nun me regne e gloria,
leggo, che pure chiù e 80 anni fa
già esistevano tante atrocità!

E io mò stò riflettenno, stò pensando,
ch'è brutto quanno o munno tene famma,
e a chilli tiempe già nc'aveva stà
chi nun teneva e solde pe magnà!

Pe na fatalità me vene in mente
un episodio,...orrido enormemente.
scoperto dint'a nu libro assai ingiallito
che fa capì comm'era brutta a vita!

E stì ricordi a me fanno paura,...
specie,quanno se tratta e “na criatura”
che, per una spietata crudeltà
aveva perso... la sua “Infantilità”!!

Pirciò io sò convinto, e aggiu capito,
che primma, o mò...é sempe o stessa a Vita.

Ispirata da un racconto di Gorkij
1928

“O’ Mappamondo”


Si dice, che la terra è rotonda,
e io mò stò a girà stù “mappamondo”,
pecché m’è venuta a curiosità
capì addò sta tutta st’Umanità!

E certamente è stata na sorpresa
vedè che songhe tanti e stì paesi,
però mò io, cu o Mappamondo ‘n’mano
terria nu desiderio,...quasi strano,...

e avé na tavula, longa, longa assaje,
ch’accummanciasse e nun fernesse maje,
e attuorno tutta chesta Umanità
stritti e abbracciate stessero a magnà!

Che bello si stà cosa fosse overo,
vedé abbracciate tutto o munno intero,
e scumparesse... sangue della miseria
tante e stì guerre, odio, e cattivenie!!!

Spes ultima mors
Na 31/07/2006



“E Tiempe e na vota”

E già, mò è arrivata a libertà
e nuje pe forza c'avvimmo accuntentà
ma a quanno s'è levata a mezo a “Lira”
a chello che succede nun ce crire!

Di cose strane ce ne stanno tante
e già,poi c'è il problema dei bagnanti
pecchè purtroppo s'è girata a rota...,
simme turnati areto n'ata vota.

Pirciò, si vide che a jurnata è bella
ricuordate d'o “Lido Mappatella”,
oppure stanno e scogli e Mergellina,
o, a vasca chiena d'acqua dint'a cantina!

Pecchè, a quanno st'Euro è arrivato
nuje overamente ce simmo arruvinate,
mò, si vuò a seggia a sdraio e 'o 'mbrellone
sarrai custretto... a fa nu cambialone!

E allora ringraziammo a libertà,
vedimmo a spiaggia libera addo stà,
pecchè o sinnò, levammo l'occasione
e o Sole jammo a piglià...fora o balcone!!!!

s'è astrignute a currea

“O Tribunale”

“Signori, entra la Corte”,...
chissà si tengo a scjorta
che o Giudice è clemente,
e che sarà un po' accondiscendente!

Signor Presidente, prendo la parola,
Titò, m'arraccumanno...una sola!
Vi prego quindi nun parlate assaje
sinnò 'o pruciesso nun fernesce mai.

Senza aspettà, po' improvvisamente
l'imputato se dichiara innocente
“Guagliò, ma insomma chi t'ha autorizzato,
tagliete a lengua, e statte assettato”.

E l'avvucate: signori Giurati,
onestamente io me sò scucciato,
ora ho deciso, e proprio sul più bello
che io voglio ricorrere in appello!

Oi nì, stù fatto però nun me cunsola,...
tu accusì gruosso vai ancora a scola?
l'appello lo decide la Giuria
mò statte zitto, taci,....e così sia!

Nu caos overamente infernale,
ma allora, chisto è o Tribunale?
nu Giudice nun tene manco 'o sfizio
e se fa rispettà chesta Giustizia?

e po' chistu mariuolo cu a faccia sfrigiata,
comme e nu pazzo po' s'è ajzato
dicendo che si è sentito offeso,
e non gli andava bene la difesa!

E allora o Giudice s'è overo sfastediato,
o state zitti, o avite na paliata,

mò piglio o martiello e a tutti stì cretini
ce donghe na mazziata areto e rine!

Quello che è scritto, di certo mi scusate
perché è fantasia, ...è sceneggiata,
però v'ho giuro in tutta onestà...
che troppo spisso...chesta è a verità.

...L'Osservatore napoletano!!

“Ma nun s’adda fumà”

Io voglio maledì, quanno nascette
a chillo che ha ‘nventato e sigarette
che forse allora nun se n’era accorto
che il troppo abuso, e vote.....causa a morte.

Ma disgraziatamente, e so tant’anni
che troppa gente stu fatto nun’ho sanno
e, nonostante ‘o male che ce fa,
“cretinamente”...continua a fumà!

E allora vide, e ‘o fatto è normale
che a poco, a poco se regneno e ‘spitale.
e nun’è detto che se po’ sempe curà
ma qualche vota ce stà ...chi se ne va!!!!

Tranne che po’, ed improvvisamente
“o cretino” ...addiventa intelligente
e accummence, pe c’accuntentà
almeno forse a fumarne a metà!

e si capisce che a vita è bella e dura,
se rinsavisce e corre a far na cura!!!!!!!?
Pirciò faciteve n’esame d’a cuscienza
e a sti cunsigli dateci aurienza,

pecchè pure si forse nun ce cride,
ricuordate però...che ‘o fummo accide!
Ma alla fine nun voglio fa ‘o pruciesso
ma e sigarette,...jettatele ‘int’o c...o!!

Speranno che...!

“Tutti e segreti e Napule”

Napule, mare, sole, allegria,
spensieratezzae gran filosofia,
comme si po', o motto e stà città
è chillo e dicere, "tirammo a campà"

Ma po', si vaje cernenno dint'a farina
t'accuorge che st'apparente ammuina
nasconne,...e quasi po' se piglia scuorno
o male che ce stà, e notte e juorno!

Forse a ragione e tante cattiverie
po' essere, chissà, sarrà a miseria?
ma invece, no, è a legge d'o chiù forte
che te provoca guerre, odio...e morte.

Ma a stà città, ch'è a chiù bella d'o munno
cercammo e nun'ha fà j' troppo 'n'funno,
e, ognuno e nuje adda collaborà
cu na speranza d'a putè salvà!

Pirciò ognuno e nuje nu piezzo e core
purtammelo a chi....nun tene ammore,
cu na speranza, che forse all'improvviso
le putimmo rjalà qualche sorriso

Speranno
Carlo Isaia

“Guardanno Gaeta”

E quatte a notte, anzi e matina
io me so arrampecato n'copp'a sta collina,
e so arrivato ncopp'o promontorio,
addò ce sta pure l'osservatorio.

Quant'è bella Gaeta
dint'a notte quieta,
nce sta na parte antica, n'ata moderna,
e, miezo che a separa na lanterna!

Cu a luce e chistu faro,
veco sti barche a mare,
tanti riflessi argienti
che se smoveno o viento.

Na barca e piscatore
che parte, mò a chest'ora,
e a largo se ne va
pecchè adda j' a piscà.

T'acale o rimmo a mare' e te fa chic'
o lievi a dint'a l'acqua e te fa ciac,....
e se ne va stu vuzzo d'a speranza
pe se riuni' cu tutta a paranza.!

Contemplazione
Agosto 1980

“Uocchie ‘e felicità”

Tu sì l’immagine chiù bella che ce stà,
sì l’espressione d’à felicità,
e, quanno po’ m’abbozzi nu sorriso
me fai tuccà cu e mane...O Paravise!

Tu, ed è la verità, no fantasia,
sì forse ‘o suonno e stà vita mia,
chissà, sò intelligente, oppur cretino
ma il nostro incontro è il segno del destino.

E poi col tempo m’accorgo che tu,
overamente, tieni assai virtù,
e, insieme a te io sento un gran bisogno
di navigar...sull’“Isola dei Sogni”.

Perché così isolati, in mezzo al mare
potremmo declamare il verbo “Amare”,
e io, me putesse cunsulà
guardanno “st’uocchie d’a felicità”!!!

Ammore Napulitano!

“Chissa’ addò sta”

Tant’anni so passati, ma nun me scordo.
pe me è na medicina stù ricordo,
e certi vote, vè che fissazione,
pare che stesse là, fora ‘o balcone!

E’ stu pensiero che me fà turmentà,
nun’aggiu mai saputo addò po’ stà
pecchè nu gran rimorso mò me vene,
è che nun sape ch’ha voglio ancora bene!

E allora p’addulcì stà vita mia
voglio campà sulo cu a fantasia
ma, troppo spisso me vene ‘e sfrennesià,
m’affaccio, e penso che stà ancora là

E’ bello sì, ma spisso nun se dice
ch’e vote a nustalgia te fa felice,
vurria, vurria,...fusse felice tu...
che bello “chist’ammore e giuventù”!!

Nustalgia e giuventù

L'altalena d'a Vita!

Chissà pecchè, mò a penzà me vene
ch'a vita è proprio comme e n'Altalena,
e già pecchè, è certo nun me sbaglio
ma spisso scenne, e pochi vote saglie!

Pirciò ce vò assaje Filosofia
e addirittura na dose e fantasia
pecchè si pò' tu buono vuò campà
jà truvà o modo e nun te 'ntussecà!!

E allora, si vuò essere felice
cerca e atturniarte sulo e veri amici,
e forse po' accussì, in armonia
può vivere...campanno e fantasia.

E e cose malamente, statte accorto,
nun 'e penzà, ...lassale fora a porta,
e po', addirittura, e senza scuorno
jà tenè a "capa fresca"...notte e juorno.

E doppo, cu stà specie e "malatia"
vide e campà sulo e "filosofia"
e accussì, a faccia e tanta gente
può affrontà a vita "allegramente"!!

Mamma

Purtroppo ancora troppi nun'ò sanno
che po' valè chesta parola "Mamma".
chesta parola cu tre zampetelle
dint'a stu munno è a cosa chiù bella!

Nun songhe eguale tutte e dete d'a mano,
e accussi te cunvinci, chianu, chiano
che pure si te sbatti, lassi, e pigli
nun songhe eguali manco tutti e figli.

Stì figli che so nati pecchè a mamma l'ha vuluti
e cu stienti e sacrifici l'ha crisciuti,
st'aneme e Dio, che tutti a piccirilli
pazziaveno cu o cerchio e cu e birilli!

Ma o tempo passa e loro sò crisciuti
ma se scordano o bene ch'hanno avuto
e qualcheduno...se piglia a libertà
pensanno ch'isso a sulo pò campà.

E chesta mamma che sape fa l'attrice
cerca e fa fessi agli estranei e agli amici,
ma sotto, sotto, tra sufferenze e affanni
t'accuorge che s'astregne 'o chianto n'ganna!

Mamma, sulo si a fissi cu nu sguardo
capisci ch'essa po' valè miliardi,
e sulo si t'abbozza nu sorriso
te fa tuccà cu e mane 'o Paraviso,

e, si sti figli teneno a cuscienza,
e all'esteriorità nun danno aurienza,
pigliatavella sì na libertà
e a chesta MAMMA currite a l'abbraccià!!!!

dedicata a tutte le mamme

“O mare”

A luna che se specchia dint'o mare
nu raggio argento ch'accarezza l'onne,
e nu silenzio d'oro ch'annasconne
tutt'e segreti d'a felicità!


Notti d'estate nun m'abbandunate,
nun rattristate tanti 'nammurate
pecché si vuje vedite dint'e core
di certo ce truvate tanto ammore

Tu luna che cu o mare stai abbracciata
parla cu o sole, e allonga chesta estate,
tu raggio argento che tieni autorità...
dancella n'atu poco e libertà:

E mentre affonna nu remo o piscatore
dint'a sta notte pregna e calore
se vede già lontano, in alto mare
o movimento e a luce d'e lampare!

Mare, tutti t'hanno sunnato,
e tanti e tanti po' t'hanno cantato,
tu puorte l'allerezza dinto 'e core
e po' sì sempe bello a tutte l'ore!!

Serapo
Estate 1980



Pensanno Napule...

Quanno se sceta a matina
e l'onna 'nfonna e scogli e Mergellina,
e, trase o raggio e sole dint'e vetrine.
E accussì nasce na bella cartulina!

E po', si serve te po' dà na mano,
è chisto o core d'o napulitano,
pure si po' nun ce starranno scuse
si p'e balcone stanno e panni 'nfuse!

Ma è chesta Napule, e nun se po' cagnà,
spensieratezza, ammore e libertà
scurdannece però e guaje d'a vita...
cu nu spaghetto, e a pizza margherita.

Ma Napule, nun s'adda vedè a fora
pecchè a dinto tene nu gran core,
è na città che nun'è eguale a l'ate
pecchè nuje overo simme tutti frate!

E in fondo poi, tutto 'o munno è paese,
e pure cà ce stà chi ne fa e spese,
é o buono che supporte o malamente
e, nun po' prutestà... ..ma, nun fa niente.

Però sta Napule e chesta è a verità,
è sempe o posto chiù bello che ce stà!!

E' chesta Napule
(però e tant'anni fa!)

“O Surriso”

Forse a chiù bella cosa che ci sia,
sicuramente è proprio a cortesia,
e, n'ata cosa bella che ce stà
è a modestia, insieme a l'umiltà!

Dint'a stù munno d'oggi, e che miseria,
ce stà purtroppo tanta cattiveria
e po' se vede, e cu na gran frequenza
invidia, odio, e troppa prepotenza.

Chissà si se putesse sperà
che qualche cosa putesse cagnà
e scumparesse tutta a 'nfamità
lassanne o posto a l'ammore e a bontà.

Si tieni fede e vuò arrivà lontano
a chi ha bisogno stiennele na mano,
pienze a campà sultanto onestamente...
piglianno o buono, e lassanno o malamente!

Affronta a vita cu gran naturalezza,
agisci sempe cu ammore e dolcezza,
rimani chiusa dint'a nu guscio e noce
basta ch'attuorno truove sulo 'o doce.

Si dint'a vita ce stanno avversità
affrontale cu gran serenità,
e alla cattiva sorte, fai buon viso
che tutto po' cagnà...cu nu surriso!!!

Marzo 1989

“O bene e nu pate”

E' bello quanno sai d'essere pate
e pienze che sì forse meglio e l'ate,
ma, doppo a vita s'affronta cu pacienza
sapenno e truvà gioie e sufferenze!!

E crescono pecchè ce stà l'ammore,
se dice, “e figli sò nu piezzo e core”,
e forse cride che o bene che c'hai dato
pe tutta a vita...a loro l'è bastato.

Passa l'infanzia, pure l'adolescenza,
pensanne che stai a posto cu a cuscienza,
ma po', pe tutto chello che c'hai dato
a chi è crisciuto, nun sarrà bastato!

E allora, è brutto o mestiere d'o pate
pecchè te siente quasi cuntrariato,
sì, l'hai crisciuti, mò so gruossi e figli
ma nun ce stanno mai,...che scumpiglio!

E po' o progresso, sta nuova civiltà
ha dato a troppi chesta libertà,
e e figli d'oggi, improvvisamente
se credeno che songhe” indipendenti”!

Se sò scurdate e “chillu piezzo e core”
ch'è stato dato a loro cu l'ammore,
e, a chi pe sempe, tra sufferenze e affanni
l'ha dato a vita,...” a Mamma”!!!

E che tristezza si stanno luntano,
che bello po', si vonno na mano
ma certamente se sarranno scurdato
quant'è bello “O bene e nu pate”!

Un papà

“O Passato”

Chello ch'è stato, è stato,
so cose d'o passato,
mò pare tutto scuro
o quadro d'o futuro!

Se po' fa qualche cosa
vedenno o munno rosa?
No, invece è na schifezza
sapenno ch'è munnezza.

Ogni juorno che passa
vide ch'è corta a cassa.
Si buono vuò campà
t'hai mettere a rubà!!!

Se campi onestamente
vide, int'a nu mumente
che t'hai accuntentà...
e, a stiento può magnà.

E allora te cunviene...
a vita pigliatella comme vene,
pure si p'o passato
sì stato furtunato!

Napoli 1989
a chi ha a vita è ghiuta storta
e, nun crede a bona scjorta

Pe nu destino

T'aggio vuluto overamente bene
tu m'e rjalato gioie e pure pene,
tu sì stata pe me, forse nun crire,
tu, comme e l'aria ch'è vita p'o respiro!

Si stata tu l'ala pe l'auciello,
aggiu goduto cu te l'ore chiù belle,
eri pe me comme a luce p'o cecato
pure si forse... sò stato lusingato!

Tu, che sì stata l'acqua e l'assetato
nun può sapè quantu bene m'hai dato,
eri pe me 'o battito d'o core
ed io cu te aggiu visto l'ammore.

Pe me sì stata na ragione e vita,
però io l'aggio persa sta partita,
io, che me sento comme e nu cretino,
ma sulo... pe nu tragico destino.

Malinconica nustalgia

“Sole e Settembre”

Chissà si è overo che l'aria e Gaeta
m'ispira, e me fa addivintà poeta,
o è Settembre, e chistu bello sole
che fa ascjì facile tutte stì parole,

o sarrà forse sta bella cumpagnia
che m'illumina tutta a fantasia!
Ma è certo che tutte stì cose 'nzieme,
fa sì ch'a rima facile me vene.

Sole, tu sì o chiù bello Sole
e chi te piglia mò overo se cunsola,
tu sì 'o sole e Settembre ed io te supporte,
però chillo d'Auste a me m'ha dato a morte!

Mò tu a du me ce vieni chianu, chiano
e io t'aspetto, t'accarezzo cu a mano:
tu sì affettuoso, sì chieno d'ammore
cu chist'abbraccio tuoje chieno e calore.


E sì che sì nu sole intelligente,
e nun te piace sì stà troppa gente,
mò simme pochi e buoni, e tu scuntruse
ce vieni cu piacere...chiù affettuoso!

E a sotto tieni o mare ch'è nu specchio,
è o mare nuovo, nun'è chillu vecchio,
e n'acqua fresca, bella, cristallina,
è nu brillante dint'a na vetrina.

L'onna che doce, doce se ne vene
che pare quasi accarezzasse a rena,
e tanto d'o silenzio che stà attuorno,...
ch'accumparite e ve pigliate scuorno!

Sole e Settembre, tu che sì scuntruse
vieni a du me, ma nun cercarme scuse,
vieni, t'aspetto pecchè te voglio bene,...
traseme tutto... fino a dint'e vene!!!

Serapo
Settembre 1981



“O Scoglio”

Si o mare è calmo, o ce sta a burrasca
è certo che nun truove mai na frasca,
però io guardo sempe fiducioso
che a vota, succedesse qualche cosa!

Ma invece primma dint'a nu temporale
truvavo gente altruista e cordiale,
tanti che ogni vota, chianu, chiano
erano pronti pe te dà na mano.

E io mò, è sicuro, nun saccio ch'aggia fa,
pare che nun sapesse chiù natà,...
e, pure si cu a volontà io voglio
miez'a stu “mare”, nun ce stà nu “Scoglio”!!!

**...però, po' è asciuto O Scoglio.
Napoli 25/02/1986**

“A capa nun’è treno”

Quanno a capa è partuta...
certamente, a capa, è capa!
Ch’è fatta treno, che tene l’orario
ca, per esempio, a pagina ventotto

te dice, “il treno tale parte a tal’ora
e arriva a totto e totto?... No?...
A capa nun’è treno, e nun tene e binari,
nun tene manco e freni, nun se regola a orari!

A capa, può sapè quanno è partuta,
ma p’o fatto e sapè...l’ora e l’arrivo,
pe d’o è passata, e quanno nc’ha mettuto...
pe te mannà,... ...dicimmo a l’atu Munno...

**e, che ne può sapè...
ch’è fatta treno???**

“Comme si fosse figlio”...!

Chissà pecchè, ma overamente è strano scrivere versi pe parlà e nu cane... però il caso è un po' particolare pe n'esemplare davvero eccezionale!

E' “Lucky” stù fenomeno mondiale e nun ce ne stà n'ato tale e quale,... pare che parla quanno te guarda é overo troppo bello stù “bastardo”

Zumpetta, corre, e le piace e pazzià, sulo a vederlo te fa cunsulà, ma certamente nu “sesto senso” tene pecchè capisce chi overo le vò bene

E, pe comme è trattato dint'a famiglia pare che fosse proprio n'atu figlio. Difatti, e forse tanti nun'ho sanno... ma, tene e sore, o pate, e pure a “mamma”!!

E, a mammarella soje sempe 'o capisce pecchè pe essa parla, non guaisce e, addirittura nun'adda parè strano ma forse 'e vote é meglio e nu cristiano



“A Sfugliatella”

Ch'addore e sfugliatella cu a cannella
e, comm'è frittola, comm'è profumata,
overamente è bona a sfugliatella,
sia benedetto po' chi l'ha 'nventata.

E' nata a Napule già tant'anni fa
chesta delizia, chesta specialità,
tene e pezzulle e cedro dint'a na dose,
ih che delizia, teh, teh, che bella cosa!

Pe nun parlà che si uno stà dijuno
o posto e una se ne mangia trentuno!
Pirciò quanno te vene nu capriccio,
magnate chella “frolla”, e pure a “riccia.”

E io oggi me sò proprio cunsulato
e songhe stato overo furtunato
pecchè m'è addirittura capitato
mangiarla “cavera”, e fresca sfurnata!

Insomma a Napule fra tante cose belle
simme e creatori e chesta “sfugliatella”,
e allora, si ve vulite allecrià,
spontaneamente veniteci a truvà !!!

napulitanamemte

O tarallaro
“Furtunato n’zogna e pepe”

Na carrettella cu na cesta grossa,
e nu paio e cazune a zompafuosse
belli taralle fresche sfurnate
cammina pe stì viche d’o Mercato

“N’zogna e pepe” so ancora cucente
io stò ccà, currite bella gente,
chesta matina ce stanno e nuvità,
jammo, v’aspetto, venitele a pruvà!

Figliò affacciateve pecchè io so arrivato
currite a sta carretta e Furtunato,
so toste e ammennule, ve faccio cunsulà,
cicoli e pepe, uè che specialità.

E accussì tomo, tomo, ogni matina
avennese già fatto o poco e vino,
miezo durmenno ,però cu l’uocchie arzillo,
veneva d’o Rettifilo Puveriello.

Ma o forte suoie, pirciò è Furtunato
so tutti e vicarielli d’o Mercato
addò e taralle ne venneva tante
quasi a nu centenare e cummerciantel!

E io cu malincunia mò v’ho dico
ch’erano belle chesti cose antiche,
ma e tempi d’oggi nun ce stanno chiù...
ma è sulo nu ricordo e giuventù!!

Quant’era bella Napoli

“O Putecaro”

Cu nu scaffale ma e lignammo viecchio,
n'terra doje scope mise dint'a nu sicchio,
nu scatule cu e spine e e lampadine,
e o sapone miez'e pezze d'a cucina!

Po', e mantesini cu e giacche e cammariere
cu na filera e piatti e bicchieri,
nu scatolino cu ago e cuttone,
cerniere lampo, forbici e bottoni,

e ate cose, chiù ne tene, e chiù ne mette
perfino e... buttuncielle p'a vrachetta!
E doppo chesti cose, mica basta,
stanno 'e giornali, o sale, o pepe, e a pasta:

E, addirittura se stà organizzando
a mettere e reggipetti cu e mutande,
pecchè, o concorrente dirimpetto
già tene e giarrettiere cu e cazette!!

Ma mò chesta puteca è cosa rara
pecchè è scumparso o mestiere e “zarellaro”,
però chistu mestiere anticamente
faceva comodo a parecchia gente.

Na Napule e l'antichità

“A ‘Mpagliaseggia”

In piazza degli Orefici, ‘o vico a Loggia
ce steva Carmenella “a ‘mpagliaseggia”,
che era nu spettacolo e guagliona,
sicuramente a chiù bella d’o rione.

E chesta attività, e io mò v’ho dico
faceva parte d’e mestieri antichi
che, quanno veneva ‘o caverò e l’Estate
cu a seggia e paglia tu t’eri rinfrescato!

E, m’allicorde, e forse nun me sbaglio
a fianco o scanno, nu cuofane e paglia
che era utile pe putè faticà,
cu tante seggie ch’aveva accuncià.

Ma Carmenella po’ nun’jeve ‘n’crisi
accuntentava a tutti cu e surrisi
e, e rispunneva cu na “erre moscja”
e, ogni tanto...scummigliava a coscia!

Mò è nu ricordo stù mestiere antico
ed è scumparso ‘o scanno dint’o vico
ma a penzà, però, parola mia,
me vene sempe na gran malincunia.

Chesta era Napule
tanti & tant’anni fa!

“O Rammariello”
Signò accattateve a ramma!

Affacciateve jammo bello
st'arrivanno o rammariello,
accattateve e tielle,
uè tengo pure 'e caccavelle.

Iammo jà, facimmo ampresse
stà a zuppiera pe fà allesse
e, non'è da meravigliare...
e furchette cu e cucchiare,

e po' non avrete danno,
sò pregiate, è tutta ramma;
po' v'avite cunsulà...
ce stà 'o tiempo pe pavà!

Sì, m'é date chianu, chianu,
pecchè io vengo ogni settimana,
si purtate ata gente
v'aggia fa nu cumplimento.

E accussì chistu mestiere
ch'esisteva fino a ajere
mò a niscjuno è cunosciuto
...che peccato ch'è fernuto!!!

Anteguerra
Napoli era il 1940

“Stù juoco d’e 3 carte”!

Nu marciapiedi e Napule, là miez’a Ferrovia
addò ce stanno tutte le Etnie,
sì guardi buono, e attorno giri o sguardo
stà accorto che ce stà...o juoco d’azzardo!

Pirciò, è nu cunsiglio, statte accorto
nun te fermà a do juoco de tre carte,
pecchè, è verità, nun’è impressione
può acchiappà di certo un gran bidone.

Po’ senti, “questa vince, e questa perde”
si juoche fai sulo “figura e m..da”
pecchè sta Gang, e t’hai capacità
so buoni sulamente p’arrubbà.

E, all’intrasatte arriva a n’copp’a mano
nu diece e tipo dall’aspetto strano
s’infiltra, e te fa na gran puntata,
ed alla fine...a carta ha adduvinata!!

E quindi tu che nun capisci niente
facile cadi ‘int’a stu tradimento,
pecchè o tipo, dicimmo un po’ anormale
é “o cumpare”, che nuje chiamammo palo.

Ma ancora mò, pure se c’è il progresso
stì cose ‘un so fernute dint’o cesso,
e, addirittura me venesse o sfizio
penzà che nun ce stà chiù na Giustizia!!!

N.B.

O cappiello và stuorto
...e, accussì adda j’.

“O Rammaro”

L'ex rammariello mò è crisciuto
pecchè po' sotto, sotto s'è saputo
che a ramma comme pure l'oro e o fierro
è stato requisito pe fa a Guerra!

Pecchè, ma chiaramente s'è capito'
sta cosa ccà fu opera e “Benito”,
che nella strategia era assai fino,
ma è logico... Isso era Mussolini.

E allora st'ex, non potendo magnare
s'organizzarono p'addivintà rammaro,
e loro che so e Sant'Anastasia
vennevano sultanto biancaria!

Po' chianu, chianu, che po' nun'era strano,
c'è chi vuleva na mutanda e lana
o chi, pe fa o regalo alla mugliera
mutanda ricamata...e giarrettiera.

E accussì poco a vota stu mestiere
divenne consistente e lusinghiero,
e, ancora mò ce stà qualcuno ancora
che s'è specializzato dint'a l'oro.

Sulo però, si a cosa costa dieci,
se venne dieci,...ma pe 10 vote,
però purtroppo ce stà a necessità!!!
che pave sulo ...quanno può pavà!!

E' il dopoguerra e Napule

“Aria e Natale”

E' overo che se sente n'aria e festa,
nu raggio e luce trase dint' feneste,
na luce bella, chiara e lucente
che s'annasconne miezo a tutta a gente.

E nun'è sporca st'aria, s'è lavata,
e tutte 'e cattiverie l'ha jettate
e s'è i'mpregnata sulo d'allegria
lassanno n'terra tutte e fetenzie!

St'atmosfera felice e carnale
è o segno che stà p'arrivà Natale
addò se scordeno tristezze e pene,
e tutta a gente s'adda vulè bene.

Scurdammece mò e tutte e cattiverie,
tutte e ripicche, l'odio, e che miseria,
guardammece e parlammece cu o Tu,
comme si ognuno e nuje fosse GESU'!!

St'aria pulita carrega d'ammore
ce fa leggere a tutti dint'o core,
jettammo ogni puntiglio, pigliammo 1'umiltà
e finalmente dicimmo a verità ...

e a verità, pure si nun cunviene
é che nuje ce vulimmo overamente bene,
e pure si e vote stà verità fa male,
dicimmo 1a peccché ... oggi è NATALE.

Spes ultima mors



“O Presepe”

Mentre pe l'aria sona l'Ave Maria
dint'a stà grotta Giuseppe e Maria
scarfannese cu o bue e l'asinello
aspettano ch'arriva 'o Bambiniello!

O pastore stà 'n'miezo e pecurelle,
e pizzeca 'o granone a gallenella
vicino o scjummo cu na mappata e panne
a lavannara. stà stanca e s'affanna.

Chi va,chi vene, pecché a curiosità
é forte, p'aspettà a Natività,
e tanti avranno fatto assaje cammino
pe vedè quanno nasce o Bambino.

E, proprio quanno scocca a Mezanotte
na grande luce allumma tutta a grotta,
che luce e stelle 'n'cielo, che splendore,
nasce Gesù e nce regne d'ammore!

E a luntano mò arrivano e RE MAGI
cu a speranza che fossero 3 saggi
e nce purtassero pe nce cunfurtà
sultanto ammore e assaje felicità.

Ma, o tempo d'oggi chisti 3 rjali
nun sò rimasti proprio tale e quali,
l'ammore s'é cagnata cu l'orrore
e regna mò sulo odio e rancore!!

E guerre, invidia e tante cattiverie
hanno distrutto o munno, ... e che miseria
speranno po' che l'arrivo d'O SIGNORE
nce purtasse tantu e tantu ammore!

“Aria e Siberia”

Cammino “miez’a via, e che misera
tanto d’o friddo me pare e sta in SIBERIA,
me voglio grattà o naso, p’o prurito
ma cu stupore ce trovo “e stalattite”

Pe nun parlà e na mano, che me pare
che fosse fatta cu o marmo e Carrara.
E piede nun me sento, però sarria capace
e me ‘nfurnà m’paranze dint’a na brace!!

A capa po’s’e tutta jacciata....
ce putessero fà pure na sciata,
po’ tocco ‘e ‘recchie ma nun l’aggio truvate,
tanto d’o friddo, se songhe arrugate!

Attuorno a gente se ferma a me guardà,
sarraggio strano, o è na curiosità,
veco na cosa che primma nun ce steve.
Sò addivintato... “L’uomo delle nevi”

A Babbo
"19 Dicembre"

l'8 e 45 Anno 69,
nun stà suffrenno chiù.
Nu figlio cu na mano n'copp 'o core,
n'ato sdraiato cu na mano n'mano,
e duje chiù gruosse se guardano sultanto:

niente tragedie, quasi nu sullievo,
ce stà o pecchè, mò s'arreposa!
Tanto ha sofferto, quantu turmiento,
specie quanno circa dieci ore primma

o miedeco c'ha ditto, "nun ce stà niente a fa"
C'era venuta quasi na speranza
pe nun 'o fa suffrì.
So quatte e figli, ma, era o pate d'o munno.

Quanta gente attristata steveno attuorno
e o juorno, e chillo appriesso
quantu dolore dint'e facce d'a gente:
l'erano tutti figli, tutti parienti,

pure o spazzino se n'è rattristato.
Era d'aspetto burbero,
ma cu nu core argento, no
era d'oro, era nu core e miele!

A gente arriva a schiere, chi vene, e se ne va
chi resta e chiagne, chi domanda,
né comm'è stato?, ma è overo?...
No, nun'è overo, ma sultanto

s'è fermato 'o core d'o corpo,
l'ato, o "core core", stà sempe ccà
pe ce dà a forza che ce vò
pe superà tutte e difficoltà!!

“Addio Nino”

E già, mò pure Tu te ne sì ghiuto,
ma o Munno quantu bene t’ha vuluto,
e, comm’e te nun resta chiù niscjuno
pecché sì stato overo “o nummer’Uno”

E po’ tu cu na grande vuluntà
hai fatto tanto,...pe nun ce lassà,
però, si a fune troppo vuò tirà...
pe forza essa po’ s’adda spezzà!!

Tu, simbolo d’a cinematografia
hai regalato sorrisi ed allegria,
e poco fa, tu...salutanno a Sordi
diciste na parola, e io m’ha ricordo...

“Mò che vaje n’cielo tu, amico mio
lassame ‘o posto...pecché vengo pur’io!”
E tu, “Nino maestro e Umanità”
a jssò, e a l’ate mò e vai a truvà.

Mò tu cu ‘o sorriso te ne fuje
però riesti pe sempe miez’a nuje!
Fusse che fusse, ‘o barista de Ceccano
ha fatto ‘nammurà ‘o munno sano:

A Nino Manfredi
04/06/2004

All'improvviso...

Ancora nun se credere
chissà si è proprio overo
ma è dura realtà
si chesta è a verità!

Tu, cu sta faccia chiena d'allegria
e st'espresione e grande simpatia
che dint'a vita tanti ammure è dato
e tanti core sempe e rallegrato,

Tu, vero emblema di signorilità,
che 'ncoppo o munno eguale nun nce stà,
Tu che creavi na bella armonia
si stato o "Re" e tutte e cumpagnie!

E cu sta barba toja grigia e bianca
(che mascheravano na faccia stanca)
Tu, cu na grande forza e volontà
purtavi a tutti na gran felicità.

Uommene buoni nun nce ne stanno tanti
e Tu ... Vulive j n'cielo miezo e santi
pecchè accussì, saglienzo "n' Paravise"
putive purtà a "Loro" nu sorriso!

E, dint'a chiesella e Santa Maria
rignava n'aria triste è nustalgia
era ò calore e na grand famiglia
comme si fossero a te ... Tutti figli!

E già pecché sulo mò s'è saputo
o munno quantu bene 'ha vuluto,
e Tu, pure si oggi "te ne fuje" ...
rimani eternamente miez'a nuje.

Tu che s'è stato sempe n'omme è core
E hai rjalato overo tantu ammore
"primma" ... c'è ringraziato Cu o sorriso
e po' ... Te ne s'è ghiuto all'improvviso!

Stì parole fatte a versi
penzo, nun saranno perse
ma sò ascjute a dint'o core
Cu n'infinità d'ammore

Nel ricordo di Italo
Napoli 7/4/2000

“Na medaglia pe l’Umanità”

Tante parole nun so ghiute ‘o viento
e t’hanno dato na Medaglia argento,
e, è stato ‘o meglio che putive fa
dando un aiuto a chesta Umanità !

E mò tu pe st’avvenimento
se vede che te senti chiù cuntento
e certamente, poi l’avrai capito
che il tuo “donare” po’ salvà na vita.

E a te, esempio di generosità
meglio nun te puteva capità,
e si ‘o core mò a te t’ho dice...
cerca e purtà st’esempio a tanti amici.

Perché la realtà, e non è un sogno
nel mondo d’oggi vi è un gran bisogno
che ognun di noi debba dar la mano
ai sofferenti e tutto ‘o Munno sano!

Pirciò mò a tutti e donatori uniti,
si stù sermone l’avite capito,
cu gran passione e forte volontà
a tanti amici veniteli a purtà.

e po’ passateve a mano p’a cuscienza
e incrementammo stà “beneficenza”
pecchè è a chiù bella cosa che ci sia...
e po’... trasite dint’a grazia e DIO!!!!!!

Dedicata a tutti i donatori di sangue
sperando... Grazie

“Chiù e nu frato”

Non so il perché, però me vene ‘o sfizio
parlare d’una cosa... “l’Amicizia”,
che dint’a vita d’oggi, è verità,
chesta parola, è difficile a truvà!

Ma a volte poi, po’ pure capità
ch’o vero amico se putesse truvà,
e allora, si stù “o vero” l’hai trovato
megli’è si ‘o tieni stritto, e ‘ncatenato.

E io sono stato davvero fortunato
pecchè stu “grand’Amico” aggiu truvato,
e, siccome le voglio overo bene
m’ho vurria attaccà cu na catena.

E tu esempio di generosità
sei il vero simbolo di “amore e bontà”
a parte che, di certo, miez’a l’ate
pe me, sì, e sarraje... chiù e “nu frato”!!!

'O cane e l'avvocate

Hanno araputa a porta,
e, pe n'amara scjorta
vide che cosa strana...
m'accumpare nu cane!

A primm'acchitto io m'ero
impressionato, è overo
quanno cu nu gran sguardo
me fissa...stu bastardo,

e senza fa burdello
se move cu a cudella.
Me guarda cu stupore
però è chieno d'ammore,

e po' mentre io cammino
me sta sempe vicino
Nu sesto senso tene,
capisce chi o vò bene,

s'alluntana,...pò trase,
fa nu zumpo e me vase!!
Me songhe 'nnammurato
d'o cane e l'avvucato.!

Napoli
Ottobre 1970

Desiderio e fantasia

Vulesse tenè overo e solde assaie
pé darli a chi nun l'ha tenuti mai,
vurria truvarme dint'a na ricchezza
pe vedè e facce chiene d'allerezza.

Vurria rjalà tanti quintali e bene
pe sollevà a gente a dint'e pene,
e putè avè doje braccie e nu gigante
per abbracciarme' nzieme a tutti quanti!

Vulesse addivintà grand'omme e scienza
pe leggere a paricchie 'int'a cuscienza,
e jettà fora tutte e cattiverie,
e purtà l'oro addò ce stà a miseria!

Vurria che scumparesse a cattiveria...,
ma chisto è suonno, nun'è na cosa seria !

Vulesse turnà po' trent'Anni areto
p'essere ancora tuosto comme e a preta,
pigliàno tutte e femmene chiù belle
e passà o tiempo sulo a fa burdello,

vurria trovà...chello che se n'è ghiuto
pecchè cu 'o calendario io sò crisciuto,
e mò, quanno me vene nu vulio...
m'adda passà...sulo cu a fantasia!!!.

Malinconicamente 2002

“Ma che so stì giornale”

O Matino, a Repubblica, o Giornale,...
comunque, ...songhe tutti “tale e quale”:
servono a “tapezzare” la mia stanza,
mò, che stò ‘ncopp’o Parco a Rimembranza!

E accussì, e ancora mò, e ogni juorno...
(niscjuno e loro po’, se piglia scuorno!),
stanno filere e machine fermate
comme si fossero ... “cammere ammobigliate”!

E chissa, po’, si areto a stì giornale
si farà ...qualche cosa di anormale,
e, si è chello che dich’io, ...(ma non lo dico),
è troppo bello,...sssssss!!!,..é nu male e f...a!

E pe stì fatti, e chesta è a verità
a Napule so na specialità,
e, quando sì custretto a sparagnà...
cu a machina e e giornale t’hai arrangià!!

“Nu ricordo e Napule”

.... o mare, o Vesuvio, Mergellina,
o Pino e Villanova, San Martino
e tanti cose belle e stà città
che ncopp’o munno non se po’ truvà!

Pirciò è certo che chi è napulitano
nun po’ campà si se ne va lontano
pecchè è sacrosanta verità...
luntano a Napule nun se po’ stà.

Pirciò chi è nato ccà, ed è verace,
se ne va fora, però nun trova pace
pecchè tene na grande nustalgia
che e vote... l’addiventa malatia!

E a “qualcheduno”, però tant’anni fa
all’improvviso le venette e penzà
che forse lui, per sobbarcar le spese
gli conveniva andar fuori paese.

Ma o tempo passa, e lui sotto sotto,
dice che d’o passato se ne fotte
e, addirittura le vene e penzà
che mò stà Napule a vò schifà!!!

Ma invece, è propr’jssso na ‘muneeza’,
e nun’è degno e parlà e stì bellezze,
e allora, và, gira p’o munno sano...
ma scuordete che sì Napulitano!!!

“Quant’è è bella Forio”

Chest’è Furio, addò stà a Chiaiulella
cu o mare piccirillo, piccirillo,
dint’a chesta minuscola marina
che te creano a meglia cartulina.

E po’ o Turrione e st’antica muntagna,
e pare ch’o ricordo stà vicino
de palle e fuoco contro e Sarracine.
Sò storie vecchie, ma o munno d’oggi cagne!

E a pigna d’uva spremme cascate d’oro
che portano allerezza dint’e core,
e comme e o sole che trase dint’o bicchiere
ma po’ te scuorde chello ch’hai fatto ajere.

E po’ ‘n’copp’o Succorso, o vî lloco
tra mare e cielo che tramonto e fuoco,
e io, che stò a ammirà stu Paraviso
veco a felicità sul tuo bel viso!

E sì stu core putesse parlà
è certo che vulesse sperà
che stì mumentì e Felicità
avessero durà in Eternità!

Ma nella realtà, poi l’ho capito
che tu te sì rjalata...’ata vita!!

Ricordi e giuventù!
Dedicata a chi dich’io

“A Panarea”

Cu ‘o mare calmo, o cu l’alta marea
è sempe bella l’acqua e Panarea,
e po’ cammine p’e stradelle scure
e te cunsuole a tenè “e piede annure”

Te vutte a mare ascjutto, ... e jesce ‘nfuso
cercanno e scansà e “muorze d’e meduse”
e po’, che sfizio, pare nun fosse overo
pecchè jà cammenà pe forza a pere!!!

Si po’ pe scjorta può truvà l’ammore,
ma chillo overo che trase dint’o core,...
cert’è che cu stà bella cumpagnia
stai buono a mare, a casa, e miez’a via.

Spisso però stà gioia arriva e passa,
e doppo poco tempo po’ te lassa,
ma quanno po’ ce stà nu sentimento
tutta na vita trasforma stù mumento!

E allora, n’copp’a st’Isola d’e Fate
vuttamme a mare tutti quanti l’ate
e quanno tutta a gente se ne fuje ...
restammo eternamente...tutte e duje...

“Pecundria”

Fors ‘è a chiù brutta e tutte e malatie
sta forma strana ch’è a pecundria,
è na forte malincunia che te piglia
e, e rutelle ‘n’capa te sumpiglia.

Cammini, ma nun sai chiù cammenà,
te sfurze e nun riesci chiù a penzà,
pare che vide’ ma nun capisci niente,
parli,...però e parole vanno ‘o viento.

E po’ capisci che nun te può appujà,
attuorno truovr sulo nullità
comme si o munno fosse all’improvviso
scumparso e tu... te truove n’Paraviso!!!

“Scusate, nun saccio comme sò arrivato,”...
ma comme, già m’avite giudicato,
e allora pe tutto chello che c’è stato
sta stu cartiello... “Qui tutto occupato”?

Ma comme è strano, ma allora e tempi d’oggi
pure ccà ‘ncoppa stà a crisi degli alloggi?
Embè, pe uno che nun po’ campà
diciteme, che s’adda cumbinà?

E siccome io me so ammalato
forse pecchè dint’a vita aggiu sbagliato,
Vuje, proprio vuje, nun avite pietà
p’uno che spera ancora e se salvà?

Eppure e stì casi ce ne stanno tanti,
e pecchè “vuje” che site overo Santi
nun facite nu spazio miez’a l’ate
e a chistu puveriello l’aiutate?

Santa pazienza è meglio a nun pensà,
o munno è overo chieno e 'nfamità,
niscjuno che t'abbozza nu sorriso,
nun truove aiuto manco n' Paraviso !

E allora pigliatella sta cundanna
suppuorte, e frenatiello o chianto n'ganna,
e medicine nun te può piglià
si chesta malattia te vuò curà,

e, forse, forse, si vuò trovà 'o sorriso
ce stà a speranza che, tutt'all'improvviso
sta pecundria che mo t'ha miso'n' crisi
cartiello o no te porta n'PARAVISE!!!

'O tric trac

Quanno appicci o tric-trac,
uè, succede o patatrac,...
corre a dritta, corre a manca,
nun se ferma, nun se stanca.

Dint'o munno d'o pallone
oggi esiste nu "campione",
nun'è gruosso, è piccirillo,
è aggraziato, è assai bellillo.!

Tene a grazia e nu Francese,
e p'a calma, pare Inglese,
n'Olandese p'eleganza,
d'e Tedeschi l'irruenza.

Corre, e nun se ferma mai,
finte po', ne tiene assai
o pallone quasi 'o spacc
pare proprio "o tric-trac."

Corre a dritta, corre a manca,
nun se ferma e nun se stanca,
è veloce chiù e nu razzo,...
pe fermarlo jesci pazzo!

Torna areto, scappa annanze
l'hai guardà, senza a speranza
che, cu tutta a vuluntà
nun 'o putarraie fermà.

Tene o 9 areto e rine,
corre d'o principio a fine,
passa a palla e precisione
da provetto Gran Campione.

Tric-trac mò 'o chiammammo
stù "muzzone" e jucatore,
e a guardarlo nce 'ncantammo,
l'ammirammo,...cu stupore!!

Dedicata a mio figlio
Era il 1977!

“Perbenita”

Dint’a nu dizionario d’Italiano
è asciuta na parola quasi strana
che o tempo d’oggi è na rarità
chistu vocabolo... “perbenità”!

Penso, da troppi nun’è conosciuta,
o, col passar del tempo, s’è perduta,
però, sò stato overo fortunato
pecchè “sta cosa” io l’aggio truvata!!

Questa è un’essenza di semplicità
‘miscata cu a modestia e l’umiltà,
a parte che ancor più, parola mia
pe primma cosa, è nu mare e simpatia.

Ma nun’è stato facile e ‘o capite
pe cumme e tiempe d’oggi è fatta a vita,
addò abbonda spisso, e che miseria
sultanto invidia, e tanta cattiveria.

E io mò, pe sta scoperta sò felice
pecchè sento stu core che me dice
che l’apice della “Felicità”
è, poter vivere di “Perbenità”.

E pirciò mò, a pensà me vene;...
bello si o Munno se vulesse BENE!!

Sperammo...
chissà!!!!!!!!!!

“A Scugnizzella”

Embè stù fatto overamente è bello,
nu “scugnizzo” che nasce cu a gunnella,
e chistu evento, ch’è na rarità...
sultanto a Napule puteva capità,...

Pirciò mò l’aggia dì, stù scugnizziello
è na criatura overo troppo bella,
e pepe po’ ne tene overo assaje,
e corre sempe, nun se ferma mai,

ma po’è difficile, v’ho giuro in fede mia
a trovà chest’essenza e pulizia!!
Tu sì o Mare, o Sole, sì na Stella
che dint’o cielo di certo è a chiù bella,

a parte po’, penso ch’è verità
sì “a coccoletta e mamma e papà,”
e cu sta faccia chiena d’allegria
sì a “nummer’uno” per la tua simpatia.

E a te, che sì l’emblema d’o Scugnizzo
te dedico stì versi, ... no pe sfizio,
ma pecchè forse, quasi comme e nu pate (?)
te songhe overamente affezziunato.

Po’ te vulesse dì... però che faccio, ...?
te lasso cu “nu vase e cu n’abbraccio”
pecchè pure si a te nun pare overo
chesti parole, t’ho giuro, sò sincere:

Dedicata
alla cara Maria Vittoria
Vomero 06/XI/2005

“Dedicata a te!”

Penso che forse nun s'è capito ancora
che ce stà chi tene nu “core d'oro”,
però, purtroppo è amara verità,
che al tempo d'oggi è na rarità!

Ma io, ho incontrato, dint'a vita mia
stù “Core”, cu bellezza e simpatia,
ch'era di certo difficile a truvà
pecchè, è l'Emblema dell'Umanità.

E po', è o ritratto d'a Semplicità,
chiena d'ammore e di cordialità,
ed è pulita, molto trasparente...
comme e l'acqua quann'esce d'a sorgente!!

Pirciò a stu simbolo d'Umanità
stì pochi versi le voglio dedicà,
a parte po', che io, cu tutto 'o core...
te vurria rjalà a “Medaglia d'oro”!

Napoli 13/02/2007
Dedicata

Sti 7 note

Normalmente e note so sette'
ma tu è faje addivintà Settantasette'
e proprio mò che la canzone langue'
tu tieni sempe a musica dint'o sanghe

Ma'certamente tutto il Mondo sa
che chist'ammore è nel tuo DNA,
pecchè si canti tu nce mietti o core
e tanta, tanta gente s'annammora.

E, per parlar di te, ma già si sa
ate parole s'avessero inventà
pecchè si o simbolo d'o Napulitano,
e pure o suonno e tutto o Munno sano!

E a stu passato tuoje dammele aurienza
pecchè hai magnato "pane e pacienza"
pecchè cu l'umiltà, senza j' e press
cu Onore si arrivato a stu success!

E, a un certo punto po' te vene o sfizio
e fa n'assist e classe a Gigi Finizio,
che, cu na mappata e scugnizzi, in fede mia
ha trasfurmato e Guagliune e Scampia!!!!

Ogni musica toja è melodia,
e na canzone addiventa poesia,
ma meglio e te mò nun nce stà niscjuno,
e tu Gigi si overo o Nummer'Uno.

Pirciò facimmo cu l'ammore n'alleamza
speranno dint'a sta "Musica d'a speranza"
Però mò aggia ferni, nun c'è chiù spazio,
pirciò t'abbraccio cu nu grande "GRAZIE"!!

A Gigi D' Alessio
con simpatia

Nustalgia d'o Ferragosto

Cheddè che me fa scrivere stasera
bevo, pecchè vogl'essere sincero,
stò sulo eppure è o 15 d'Austo
ma io me cunsolo,...cu "na fella arrusto"!

E io bevo, ma, torna alla memoria
a poco, a poco tutta quanta a storia
che io m'ha ricordo cu gran nustalgia,
ma, che purtroppo è "overo a vita mia"

Però stà cosa nun'è confortante,
pecchè io sò nato da gran "benestante"
e, sò criscjuto senza difficoltà
miez 'o benessere e a felicità.

Ma l'omme è comme 'o grano, e chello cresce
ma a qualcheduno purtroppo nun riesce
e si o destino t'avrà cundannato ...
jà crescere...pezzente e sfurtunato!!

Io scrivo, ma nun'è na cunsulazione
a restà sulo fora a nu balcone
mentre a chest'ora, chissà quanta gente
se cunsole miez 'e divertimenti.

Ma, io so cusciente, e tengo l'impressione
comme fosse juto a me fa na cunfessione
e 'o Preveto me dà na "punizione"
dicenno, ...a vita toia è reclusione!

Ed io mò zitto, buono e senza scuse
me ne stò sulo, quieto, e annascuso
pecché, chest'è la pura verità
chi è Omme adda tenè "grande umiltà."

E accussì io miez'a tanta gente
me stonghe sulo, umile, e pezzente,
e stò a penzà agli errori d'o passato
e, a quanti, e quanti "m'hanno bidunato"

E mò, annanze a chesta fetta arrusto
dint 'a st'afosa sera e Ferrausto
penzo che DIO ch'è overo che ce stà
forse qualcosa putarrà cagnà!!!

Chissà!!!!
1971

Indice

Prefazione	5	
Napule...Nà	7	
Io sò accussì!	8	
A matina	9	
O primm'Appuntamento	10	
Na fronna	11	
Napule comme'era e comm'e mò!	12	
O ricordo d' a Lira	13	
M'Paravise	14	
E viche e Napule	15	
A Puntura	16	
Era 'o salotto e Napule	17	
L'Arcobaleno	18	
Stà affacciata a o balcone	19	
A miseria fa a Guerra	20	
A verità e a buscja	21	
L'Umanità....	22	
Nfamità	23	
A gioia e nu tramonto	24	
All'Aldilà	25	
A vita ...comm'era!	26	
O' Mappamondo	27	
E tiempe e na vota	28	
O Tribunale	29	
Ma nun s'adda fumà!	31	
Tutti e segreti e Napule	32	
Guardanno Gaeta	33	
Uocchie 'e felicità	34	

Chissà addò stà.....	35
L'altalena d'a vita	36
Mamma	37
O mare	38
Pensanno Napule	39
O sorriso	40
O bene e nu pate	41
O passato	42
Pe nu destino	44
Sole e Settembre	45
O scoglio	47
A capa nun'è treno	48
Comme si fosse figlio	49
A sfugliatella	50
O tarallaro	51
O Putecaro	52
A Mpagliaseggie	53
O Rammariello	54
Stu juoco d'e 3 carte...	55
O Rammaro	56
Aria e Natale	57
'o Presepe	58
Aria e Siberia	59
19 Dicembre	60
Addio Nino	61
All'improvviso	62
Na medaglia pe l'Umanità	64
Chiù e nu frato	65
O cane e l'avvocato	66

Desiderio e Fantasia	68	
Ma che so stì giornale	69	
Nu ricordo e Napule	70	
Quant'è bella Forio	71	
A Panarea	72	
Pecundria	73	
O tric trac	75	
Perbenità	78	
A Scugnizzella	79	
Dedicata a te	80	
Sti 7 note	81	
Nustalgia d'o Ferragosto		82

Ch'è addivintata NAPULE !!

Bell'è o ricordo e Napule e na vota
però purtroppo mò s'è girata a rota,
sulo a pensarlo overo è na tristezza.....
era nu Paraviso,....e mò,..é MUNNEZZA!!

Che brutta cosa ...,Madò che scuorno,
se parla sempe e Napule,....notte e juorno,
ma pe disgrazia, non pe c'elogià
ma, sulamente pe ce murtificà!

E overamente simme jute n'funno
oggi simme schifate a tutt'o Munno
e tanti forse nun l'hanno capito
che chi cumanne oggi....é " a malavita "!

E già pecchè stà cosa è troppo amara,
sò troppi gl'interessi p'e denare
e ogni juorno troppo sanghe scorre
sempe pe colpa e sta sporca e camorra!!!

Chissà si na speranza ce po' stà
che qualche cosa putesse cagnà
e cu gran volontà, e assaje fatica
se putesse riavé....." a NAPULE Antica " .

Però si vulimme vedè e " faccie cu o sorriso"
scurciammece e maniche d'a cammisa
e tutti nuje cu ammore e cu allerezza
mettimmece a levà chesta " Munnezza " ,

E po' nun fosse na grande faticata
si c'interessassemo d'a "DIFFERENZIATA "
pecchè, si 'o Munno ancora nun l'ha capito
vulimmo a nostra " Napule pulita "!!!

Chist' è o messaggio p'o Munno sano
Carlo Isaia

“N’ATA VITA”

Forse nun l’aggiu persa sta partita
e, justo, justo ‘n’tiempo aggiu capito
che a vita - “VITA” è ammore & dolcezza,
si lasse areto “l’ata”....ch’è munnezza!

Io mò trovo ‘o cunforto e na parola,
e aggiu visto quant’è bello ‘o sole,
pecchè quanno tu “larva” te riduce....
vide stu munno scuro, e senza luce.

Sì, io forse steve jenne troppo ‘n’funno
ma mò o passato pe me è sulo suonno,
nu suonno brutto assje , ch’aggia scurdà,
.....pecchè mò saccio cheddè “a Felicità” !

Felicità pe chist’angela e figlia
e pe stu gran calore e na famiglia,
tranquillità pe n’ammore ritrovato
che cu gran volontà m’ha trasfurmato,
ammore pe na mamma che m’ha dato
metà d’o core, e io l’aggio cuntrariata,
ammore’ammore pazzo pe nu pate
che meglio ancora nun l’hanno ‘ inventato,
ammore, Ammore e forse nun se creere
pe chest’aria pulita....che respiro:
mò aggio capito e che culore è o mare,
o sole, a luna,.....tutte cose rare

Lassammo areto mò tutto o passato
pecchè io n’ata vota songhe nata,
sì,.....so nata crisciuta, ch’aggia fa?
ma tengo attuorno n’aria e libertà.

So libera, so allera, s o felice,
e veco attuorno a me sultanto amici:
Io sento ‘o scjato d’a gente che vò bene
e stù calore me trase dint’e vene.

Io so felice pecchè aggiu capito.....
che me so rjalate “N’ATA VITA” !!!

Ad Adriana Fucci
nel ricordo di un grande papà
1992 Carlo Isaia

Comme e na rota

Chi nasce quadro nun po' murì tunno,
è chesta a legge eguale a tutt'o munno,
chi nasce buono e onesto, certamente
nun po' cagnà...p'addiventà fetente!

Nò spisso però forse qualche vota
a vita se trasforma dint'a na rota,
e,quanno pensa addò s'addà fermà
o t'arricchisce, o te po' arruvinà

·
È si è a siconda, allora che vuò fa.....
tirati a fora tutta l'umiltà,
affronta a vita cu semplicità
caccianno a fora tutta a bontà

·
Megli'é nu panno rutto, ma pulito,
pecchè sulo accusì pe tutta a vita
può cammenà sicuro miez'a gente
pure si nun s'è ricco ma pezzente!!
Carlo Isaia
1969.

"...nu scugnizzo..." quasi napoletano !

Si', è nato a Marsala, che ce putimmo fa però tene nu sacco e qualità,..... e chistu fatto nun v'adda parè strano pecchè o " DNA " è napoletano!

Certo che Luca pure se è ancor bambino é facile a capi.....ch'è nu " mappino ", chesta parola che da noi certamente' è intesa come fosse un complimento.

E già pecché po'..." chistu scugnizzo " lo vuoi, o no, t'ho truove sempe ' mpizzo ogni cosa che vede adda tuccà e, s'arrecra...si t'adda sfruculià!!!

Però, è bello , è 'o meglio e tutto 'o munno, é " l'aria che respirano " sti' nonni, che alla fine, nun sanno ch'hanno fa si " stù murzillo " s' adda supportà.

Insomma, pe sti' nonni s'è capito..... chistu " mappino " è " nu piezzo e vita " e tanti vote po' a penzà ce vene che a chistu Luca 'o vonno troppo bene!!!!

Dedicata con enorme affetto

I Nonni !!
Napoli, 11/05/2009

" Mò si' turnata a nascere!!! "

Chissà se nel percorso della vita,.....
e già parecchi l'avranno poi capito,
pure se questa cosa.....ti rincresce,
purtroppo " qualche unione "..non riesce!

Ma poi può capitar, e non'è strano
che, col passar del tempo, piano, piano,
pur se nel correre, " non perdi la scarpetta "
incontri,.....quando meno te lo aspetti

chi, come un fulmine a ciel sereno,
che arriva all'improvviso , senza freno (!),
ti può cambiar,.... (ma già lo si è capito),
completamente....." il corso della vita " !!

E, addirittura, cu " stù girà d'a rota,
è comme ... " si nascisse n'ata vota "
e, dint'a stà bella faccia all'improvviso
si vede splendere un gran " bel sorriso "!!

E addirittura poi, che cosa strana.....
l'artefice di ciò, " è nu divano ! "
che ha generato con il suo " calore "
un unico possente " grande Amore " .

Ed io mò te voglio dicere,
che si' turnata a nascere,
e chist'Ammore ch'è na " Realtà ",
t'adda fa viveree " Felicità " !!!

Carlo

" Comme na farfalla "

Sì comme e na farfalla: zompa e vola,
nun stai mai ferma, e stù fatto te cunsola,
e tu pe me, ed è giusto che t'ho dico,
sì overo " na guagliona chiena e vita " !

Sì mamma, sì mugliera...e pe stì stì figlie
sì overamente 'o pierno d'a famiglia,
e tu, ma non per farti complimenti
sì " l'acqua pura quann'esce da surgente!!
"

E poi si nota, e senza alcun stupore
che sì na Mamma chiena d'Ammore,
e già pecchè, o destino t'ha dato
doje belle figlie,....e sì furtunata.

Ed il tuo Nino di te certo è degno
pecchè sì " o pane e nu forno a legna ",
ma se capisce, pure se non lo dici.....
che l'ucchie tuoje sò...." uocchie felici "

Ed io vurria, (comme me dice 'o core)
che fosse sempe vivo chist'ammore
e, cu stù bello marito, e chisti duje bijoux, ...
t'auguro tutto 'o bene che vuò tu!!!!

dedicata alla cara Daniela
cu nu mare e simpatia
Carlo Isaia

Napoli, 13/09/2007

" A pneumologia "

A quando è nato 'o munno s'è saputo
ch'è necessario a ce guardà a salute,
pecchè è logico, che pe putè campà,....
frequentemente c'avimme cuntrullà!

Ma, e vote,ed è purtroppo verità
può venir meno la professionalità,
e, pur se raramente è capitato
che, qualche diagnosi, è stata sbagliata.

Ma vi è il caso, ch'e vote, miez'a l'ate
ce ne truove " uno ",ch'è comme e "nu frato,"
pirciò, si stù " parente " l'hai truvato,....
te l'hai tenè overo " 'ncatenato " !!

Ed io songhe stato proprio furtunato
pecchè overo po' l'aggiu 'ncuntrato
e, addirittura po', che cosa strana,.....
è, " o nummer'Uno " e l'Asl d'Antignano!

E forse dint'a Pneumologia
penzo ch' overo è o meglio che ci sia.
E io mò alla Scienza non vorrei far uno sgarbo,....
ma,"a megli Medicina ".....".é Longobardi".

Mò me resta sulo na cosa,...e l'aggia fa,
stregnerte cu n'abbraccio, e puterte ringrazià!!!!

Dedicata
Carlo Isaia
14/11/2007

"L'ISOLA dei SOGNI"

Chissà se nel percorso della vita
qualcuno forse certo avrà capito
che 'e cose d'o passato adda scurdà
se vuol godersi la felicità!

E già pecchè sarà che nel passato
qualche amarezza sarà capitata
e pirciò ci può essere il bisogno
di trovare un' "Isola dei Sogni" !

E allora, ad ognun di noi conviene
a pensar solo di volersi bene
e, certamente è assai chiù furtunato
chi chistu bene già a qualcuno ha dato.

Sulo accusì te può sentì felice
a vederti atturniato a buoni amici,
e sì purtato a putè sunnà
una tua Isola della Felicità!!

Poi puoi trovare un gioco di prestigio
che te fa scumparì 'e capille capille grigi,
e allora forse te cunvinci tu.....
che tieni...na siconda giuventù.

Pirciò cu a fantasia vide addo stà
.....questa tua Isola della Felicità.

"E TIEMPE e NA VOTA"

E già,mò è arrivata a libertà
e nuje pe forza c'avvimmo acccontentà
ma a quanno s'è levata a mezo a "Lira"
a chello che succede nun ce crire!

Di cose strane ce ne stanno tante
e già,poi c'è il problema dei bagnanti
pecchè purtroppo s'è girata a rota.....,
simme turnati areto n'ata vota.

Pirciò,si vide che a jurnata è bella
ricuordate d'o ." Lido Mappatella ",
oppure stanno e scogli e Mergellina,
o,a.vasca chiena d'acqua dint'a cantina!

pecchè, a quanno st'Euro è arrivato
nuje overamente ce simmo arruvinare,
mò,si vuò a seggia a sdraio e 'o 'mbrellone
sarrai custretto.....a fa nu cambialone!

E allora ringraziammo a libertà,
vedimmo a spiaggia libera addo stà,
pecchè o sinnò,levammo l'occasione
e o Sole jammo a piglià...fora o balcone!!!!

s'è astrignute a currea

" O circo e l'Ammore "

Se dice che n'amico è nu tesoro,
e addirittura è quasi comme e l'oro,
però ce stà chi o munno l'ha girato.....
e, o vero amico nun l'ha mai trovato.

L'amico, Amico, ...stà dint'e sufferenze
all'improvviso, quanno meno se penza,
e o truove dint'e mumenti e nustalgia,
ch'è sempe pronto a farti cumpagnia!

Ce sta l'Amico cordiale e sincero
o chi se dice amico...e nun'è overo,
e ce sta chillo cu a faccia pulita,....
o chi po' a tene abbastanza truccata!

E, dint'o Circo, cu a " pittura 'n'faccia"
se trova sempe a figura d'o Pagliaccio.
Mò, a penzà a vita, e a chello che ce resta
ce n'accurgimmo ch'è comme 'o Circo Equestre!

E o Circo è risaputo è poliglotta
assai stranieri, ce ne stanno a flotte,
Francesi, Inglesi ,Russi , e Americani,
mangiano 'nzieme tenennese p'e mane!

Ma, dint'o munno, nun ve meravigliate
so troppi chille cu a faccia pittata
pirciò, si 'o vero Amico l'hai trovato
nun 'o lassà.....tienilo 'ncatenato !!!

E' chesta a verità!

"A ricchezza d'o CORE"

Parecchia gente, penso che se scorde
che la felicità, nun sta 'int'e solde,
e io le vulesse di, vî po', che sfizio
che o meglio "capitale"....., è l'Amicizia!

Chesta parola che, a quando è nata
vuleva di che simme tutti frate,
però, purtroppo, ed è la verità,
n'coppa a sta terra è troppa a 'nfamità

Ma dint'a vita vi sono le eccezioni
e, spesso, è il fato, o è na cumbinazione
che capita, per gioia, o pe dispetto
ch'o vero amico, lo trovi dirimpetto!!

E mò vurria parlà cu 'o munno sano ,
io, cu stu core e nu napulitano,
che si 'int'a vita bene hai seminato,
di certo il "ben" ti vien contraccambiato

E io mò cu 'o core, pirciò stî pochi versi,
speranno po' che nun sarranno persi
a chi mi è amico é voglio dedicà
cu simpatia, e gran sincerità!

Ma, sta parola, ch'è na rarità
è sempe chiù difficile a truvà!!.....

"A N' AVVUCATE"

A Pontenuovo, na strada fatta a vico
stà e casa nu vero e caro amico,
che a parte ch'isso è grand'omme e scienza,
tene nu patrimonio d'esperienza.

E, comme pe fa dispietti a l'ate
a tutti è fortemente rispettato,
si 'o 'ncuntre in Tribunale, o miez'a via
t'illumina e na grande simpatia.

'N'coppo a stu munno ch'è chieno e corruzione
ce stanno sulo pochissime eccezioni,
e l'isso ch'è nu stemma e l'onestà
s'esprime cu na gran semplicità.

Ed io pe tantu bene ch'aggio avuto,
mio caro e stimatissimo Ricciuti,
penso che chi te sape sulo a fora
nun po' capì che tieni tanto Ammore!

Pecchè proprio 'int'e tragici mumente
tu cacci a fora tutti e sentimenti;
pe me sì sempe giovane, nun sì vecchjo
ma nun te vide spisso dint'o specchio,

pecchè si o specchio dicesse a verità
tu t'accurgisse in tutta libertà,
puresì a te 'o sorriso, va, e vene,
a " dinto " quantu e quanto bene tieni!!

Tu, t'ho dico io.....e a mia nun'è follia
t'ho giuro che sì o meglio amico mio.
Sì, parlo e Te, certo, nun parlo e n'ato,
t'ho voglio di....."pe me sì chiù e nu frato" !!!

Dedicata ad Enzo Ricciuti
con gratitudine & simpatia

Napoli, 05/12/1980

Carlo Isaia

" 'O PLAID "

GALEOTTO fu il plaid di Natale,
ma in fondo poi nun'era tantu male
pecchè chillu calore , chianu , chiano.....
faceva sì, ch'io te tucasse a mano!

e tu, facenno a faccia un po' scontrosa
ti stavi, senza truvà niscjuna scusa,
e, queta, queta, zitta, sola, sola,
parlavi sì,ma senza dì parola!!

E po', siccome io nun so cretino,
capivo che, forse era 'o destino,...
avevi ritrovato un gran sorriso.
e po' chissà pecchè all'improvviso....

E, doppo st'esperienza s'è scoperto
ch'è overo bello a stà sotto a cuperta,
pure si e vote te po' capità
che, pe nu "plaid" te può 'ncatenà. !!!

Era Natale, ma
un po' particolare .

Mò basta,....nun pazzià!

E jammo, jà.....fernimmela e pazzià,
cu stì pazzielle.....ce vuò 'ntussecà?,...
ma insomma, a fa stì scherzi, che te vene....
o vuò capì che o Munno te vò bene??

E allora tu carissimo " Don Ciccio "
cerca e nun fa chiù chisti pasticci,
ma o fatto è chiaro,tu, con disinvoltura
vulive farti....." na villeggiatura " !

Però, siccomme l'aria spisso cagna.....!
nun scegliere chiù " chella e sta muntagna ",
pecchè se ti vorrai consolare
vattenne a qualche parte addò stà o mare.

Ed era certo che tu " gran Direttore "
essendo poi un vero gladiatore
hai dimostrato con volontà e " cipiglio "
che putive vincere ogni " battaglia "!

E mò, tu cu "st'emblema e giuventù "
ch'è una delle tue tante virtù,
faccillo nu piacere,e certo è il caso....
fa nu sorriso,.....e fatti dà nu vaso..!

Dedicata ad un grande uomo da
tanti e tanti che te vonno bene

Napoli 12/09/2007

